

授堂金石文字續跋

授室金石文字續跋目錄

卷一

周

西宮襄戎夫盤銘

巳侯鍾銘

號楫大林和鐘銘

漢

王莽居攝壇壇刻字

孔廟置守廟百石卒史碑

孔君墓碑

魯相史晨祠孔廟奏銘

熹平殘碑

潘乾碑

張遷表頌

王稚子闕銘

周公成王畫像

孝堂山畫像

晉

任城太守孫夫人碑

陳

攝山棲霞寺碑銘

前秦

廣武將軍碑

鄧太尉祠碑

元魏

司馬解造彌勒像記

魯衆造像記

崔敬邕墓誌銘

姜氏造像記

陸希道墓誌銘

樊道德像記

張法舜造像記

中岳嵩陽寺碑

卷二

東魏

敬使君碑

張府君殘碑

李仲璇修孔子廟碑

楊顯叔造像記

王雙虎造像記

僧惠造像記

太公廟碑陰

法師惠猛墓誌銘

白駒谷題名

大覺寺碑

趙振造像記

石佛背殘字

北齊

趙郡王高歡碑

鄉老舉孝義傳敬碑

趙郡王高澄碑

會善寺造像記

佛庄石文

後周

豆盧恩碑

隨

仲思那造橋碑

東阿王廟碑

澧水石橋勳文碑

宋文彪造澧水石橋碑

失名造像記

卷三

唐

昭仁寺碑

行睦州刺史張琮碑

左屯衛將軍姜行本勒石文

萬年宮銘

劉元意造像記

南平長公主造像記

趙王福造像記

王行寶造觀世音像記

濟度寺尼法願墓誌銘

僧思察造像記

惠蘭造像記

阿彌陀像文

天后御制詩及書

□□社義碑

褒盧正道勅

王徵君臨終口授銘

封祀壇碑

□龕像頌文

石龕阿彌陀像銘

觀世音石像銘

河東州刺史王仁求碑銘

鎮軍大將軍吳文碑

京苑總監茹守福墓誌

太子舍人王無競墓誌銘

元宗御製詩石刻

後漢大司農鄭公碑

紀大山銘

嵩岳少林寺碑

靈運禪師功德塔碑銘

敬節法師塔銘

北嶽神廟碑陰

碑陰下截記文

北嶽神廟碑

三藏無畏不空法師塔記

濟度寺尼惠源神空誌

元宗御注道德經石刻

尼靈覺龕銘

裴稹墓誌銘

卷四

唐

趙思廉墓誌銘

梁懷貞造像記

楊珣碑

東方先生畫贊碑陰記

雲麾將軍劉感恩墓誌銘

內常侍孫志廉墓誌銘

憫忠寺寶塔頌

邱據題名

劉士深等西嶽題名

郭敬之廟碑陰

田尊師碑

怡亭銘

鍾離縣令朱巨川告勅牒

大證禪師碑銘

元次山墓碣銘

蘇敦華嶽題名

龔邱縣令庾公德政頌

盧綸題名

同光禪師塔銘

崔微嶽廟題名

黃石公祠碑陰記

黃石公祠記

元澄華嶽廟題名

盧朝徹謁嶽廟文

李謀等西嶽題名

內侍監高力士殘碑

無憂王寺真神寶塔碑

上官沼題名



卷五

唐

鴛鴦碑題名

大辨正廣智三藏和尚碑

吳嶽祠堂記

救苦觀世音菩薩石像銘

法玩禪師塔銘

裴潏嶽廟題名

鄭全濟華嶽題名

河東鹽池靈慶公神祠頌碑

徐浩神道碑

軒轅黃帝鑄鼎原碑陰

楚金禪師碑

勅追諡號記

渤海郡王高秀巖墓碑

楊岐山廣禪師碑銘

壁畫功德記

薛存口題名

盧公夫人崔氏誌銘

內侍李輔光墓誌銘

南海神廣利王廟碑

王璠華嶽題名

裴穎華嶽廟題名

邠國公功德銘

執笏豆西嶽題名

韋公式華嶽題名

李虞仲華嶽題名

三藏大遍覺法師塔銘

李景讓等西嶽題名

卷六

唐

陳商嶽廟題名

崔邠嶽廟題名

崔慎由華嶽題名

李貽孫題名

于德晦華嶽題名

杜順和尚行記

盧鄩幼女墓誌

定慧禪師傳法碑

率堵坡塔銘

左拾遺孔紆墓誌

尊勝陀羅尼幢記

重藏舍利塔記

蜀王師蓋文達碑

贈邛州刺史狄公神道碑

張孝孫華嶽題名

蔣羅漢題名

寶鞏題名

司空圖不全詩句

南詔蠻頌德碑

南詔磨厓題名

馬公神道碑

魏公先廟碑銘

淮南節度使李珣神道碑

重修法門寺塔廟記

卷七

後梁

馮行襲德政碑

贈太尉葛從周神道碑

河東監軍張承業墓碑

鈞大德塔銘

後唐

重修古定晉禪院千佛邑碑

後晉

尊勝經幢

羅周敬墓誌銘

復溪州銅柱記

後周

衛州刺史郭進屏盜碑

任公屏盜碑

中書侍郎景範碑

卷八

宋

佛頂尊勝陀羅尼經幢記

西陽明洞記

修唐太宗廟碑銘

重修鑄龍興寺大悲閣像碑

重修北嶽安天王廟碑銘

青山廟新修三門記

刻說文偏字原

高紳等題名

修文宣王廟記

錢惟演北岳題名

賀遵式北嶽題名

李允正北岳題名

龐奎題名

文宣王廟大門記

建廣武原宣聖家廟碑記

周瑩北岳題名

汧陽縣普濟禪院碑銘

龍門銘

元聖文宣王贊加號詔

楊永貴北嶽題名

康廷讓北嶽題名

呂言同北嶽題名

空桑廟碑贊

真宗御製先天太后贊

嚴國禎題名

高繼勳北嶽題名

太行山道劄子

北嶽安天元聖帝碑銘

王懷珪題名

王能北嶽題名

卷九

宋

章安世北岳題名

內侍殿頭鄧保口題名

摩騰入漢靈異記

段微明題名

元聖帝廟詩并序

賜賀蘭柄真勅并贈詩序碑

張旻留題詩石刻

西京龍門山大像龕題名

濟源令陳公善政錄

勸慎刑文并序

范雍題名

留題延慶寺詩

衛夫人墓誌銘

陳述古題名

李惟賢北嶽題名

朝城縣孔子廟記

田況題名

韓魏公北嶽題名

重修北嶽廟記

趙滋北嶽題名

王鼎北嶽題名

李杞題名

劉兼濟北嶽題名

蘇舜元題名

京兆府小學規

卷十

宋

興州新開白水路記

造萬安橋記

王世安北嶽題名

韓愷墓誌銘

贈中書令韓國華神道銘

鍾宗直等題名

畫錦堂記

王巖叟北嶽題名

史炤題名

王肅北嶽題名

閻詢題名

劉忱題名

潘孝知北嶽題名

修晉太尉嵇公廟碑

陳繹題名

孫純題名

孫固題名

祖無擇寇仲武題名

蔡延慶題名

劉航題名

王紳題名

張叔卿題名

郝闓之題名

淨因院主贊大師墓誌銘



法興寺新修佛殿記

張舜民題名

薛紹彭題名

韓歧北嶽題名

蔡延慶北岳題名

薛昌朝等西岳題名

薛侏題名

郝宗臣北岳題名

杜純題名

兩司馬公題名

韓魏公祠堂繪畫遺事記

京兆府新移石經記

修邵陽縣學記

徐震北岳題名

韓南仲北嶽題名

游師雄題名

卷十一

宋

韓侂胄北岳題名

黃山谷書陰真君詩

通利軍鐘款識

岑巖起題名

韓宗厚墓誌銘

韓宗道墓誌銘

白雲山主利師塔記

三十六峯賦

太平州蕪湖縣新學記

勅賜靜應廟牒

王評題名

濟州金鄉學記

張臬題名

席旦題名

元豐大觀詔書後序

張戴等題名

宗城縣新學記

陳彪題名

趙德甫題名

勅賜神居洞崇道廟額碑記

豐澤廟勅牒并記

左山興化禪院普同塔記

邢恕題名

改修孟州門頒詔廳碑

西嶽題名

杜詵等題名

游師雄墓誌銘

無盡藏岩跋

封靈峻昭應博濟永利公勅

儀制令石刻

文丞相題琴背詩

偽齊

孟邦雄墓誌銘

華裔圖

卷十二

遼

李內貞墓誌銘

景州陳宮山觀鷄寺碑

觀音菩薩地宮舍利函記

雲居寺供塔燈邑碑

金

智度寺邑人供塔碑銘

定光禪師塔銘

普照寺碑

張汝爲題靈巖寺記

宗城縣新修宣聖廟記

雲居寺重修舍利塔碑

彼岸院勅牒

大天宮寺碑記

大明禪院記

濟源縣創建石橋記

重修中嶽廟碑

靈巖寺開堂疏

汝州香山觀音禪院記

重修文宣王廟記

大明禪院鐘識

濟陽縣創建宣聖廟碑

會善寺請寶公長老疏

太原王氏墓記

代茂郡侯段鐸墓表

崇公禪師塔銘

洞真觀碑并記

請琮公開堂演法疏

十方靈巖寺碑陰題名

卷十三

元

中京副留守陳規墓表

太清宮聖旨碑

修釋迦院記

廉訪使楊奐神道碑

修建長春觀記

重立孟州三城記

分司揆務重立孟州碑

追封魯郡公許公神道碑

重建普門塔銘

濟寧路錄事司廳壁記

無住禪師碑

重修三官廟記

濟州重修大成殿記

創建福勝院記

卷十四

元

孟子墓碑

饒陽縣新遷廟學記

扁鵲廟記

重刻哀恒山公詩

漁庄記

有商烈祖聖帝廟碑

寧玉神道碑銘

袁州路修建記

至聖文宣王碑陰題名

加封大成至聖文宣王碑

重修顯聖廟碑記

贈中憲大夫張成墓碑

任城二賢祠堂碑

重修慈雲禪寺碑

貞潔堂銘

重摹祭殷大師文碑陰記

呂梁鎮慶真觀碑記

涇縣尹蘇公政蹟記

元應張真人道行碑

涿郡歷代名賢碑

真定路加葺宣聖廟碑

魏王輔嗣墓碣

達本長老勤跡碑

魯山縣建醫學講堂記

重修中嶽廟碑

哈刺魯公墓碑

吳恭祖神道碑銘

重修五龍堂記

山東鄉試題名碑記

任公孝思記

授堂金石文字續跋卷一

偃師武億虛谷著

男穆淳編

孫承重校刊

周西宮襄戎夫盤銘

盤銘予收得拓本後入京師又閱孫季述集諸家釋文讀之始了晰其題西宮云者古命士以上父子皆異宮故因所居以爲氏乃有西宮之目襄則其謚而戎夫爲其字也又云自淄涉以南至於大沽一表以陟二表至於徼柳復涉淄涉零阻原隊以西表於敵淳桂木表於艾遼表於艾循內陟艾登於丁淳表剗麻隊陵剛肝表於單循表於原道表於魯道以東表於遊東疆右還表於莧循曰南表於卻道循曰西至於唯莫莧井邑田自稿木循左至於井邑



表循以東一表還以西一表陟剛三表降呂南表於同衛  
陟州剛登厓降棫二表皆記爲標表田之事禮記郊特牲  
八蜡內郵表啜謂於田界啜連處樹表銘所指卽其事春  
秋左氏傳襄二十五年表淳鹵正義云淳鹵地薄故表之  
輕其賦稅然則表所施又以分地之瘠腴爲恤民艱計也  
古制湮晦以此銘所識涉原歷岡猶可仿相如是金石刻  
之流傳安可不爲護惜耶後云乃敢圖大王於豆季速謂  
稱大王者六國時器案大讀若太周有號大王者盧侍中  
禮記注美大故號之又詩韓奕汾王之甥傳汾大也正義  
引釋詁曰墳大也傳意以墳汾音同故亦爲大也王肅云  
大王王之尊稱也則周時固有稱王爲大者此爲周器無

疑也

已侯鍾銘

已侯鍾銘近人在壽光舊紀城得之今爲益都李孝廉廓收置藏于家鐘高五寸圍一尺一寸上有柄長五寸柄間有環徑一寸二分腹作乳釘形凡三十六質厚五分皆以工部營造尺度之文凡六字云已侯侯止齣醴案桓二年穀梁傳秋七月紀侯來朝注隱二年稱子今稱侯蓋時王所進及莊四年紀侯大去其國則紀稱侯至夫國僅二十一年此名侯者卽于此時矣公羊傳莊四年哀公亨乎周紀侯譜之追書爲文也又穀梁傳云已卽是事而朝之注已紀也桓與諸侯校數功勞以取宋賂不知非之爲非貪愚之

甚紀不擇其不肖而就朝之范氏注已爲紀與古文合漢書律歷志理紀于已廣雅釋言統已紀也

案文當作統紀也傳刻誤

紀義訓皆爲已是紀與已爲一字便爲紀侯名未審的作何字或曰古文虎也

號叔大林和鐘銘

鐘銘拓本何夢華所藏云得之故友司馬達甫其文稱皇考號叔旅曰丕顯皇考惠叔穆秉元明德御于乃邦稽首作對旅敢啓帥刑皇考威義爲御于天子迺天子多錫旅休旅對天子魯休用作皇考惠叔大替和鐘皇考嚴在上異在下鏗鏗越二降旅多福其萬年子二孫二永寶用享

依阮詹

案外傳周語周景王鑄無射而爲之大林蓋卽此

鐘所由名然攷其時虢亾已久安得復有虢叔爲之效尤  
此殆其後續封也唐書宰相世系表西虢地在虞鄭之間  
平王東遷奪虢叔之地與鄭武公楚莊王起陸渾之師伐  
周赧王滅虢于是平王求虢叔裔孫序封于陽曲是爲郭  
公表文雖舛然言序封者要有据依則與予所証相符楚  
簡王十四年越旣滅郟及頃襄王十八年復有鄒費郟邳  
四國春秋時小諸侯絕而繼世類如此者不可僕數也叔  
初封于虢子孫因之世世稱叔猶樊仲山甫後有樊仲皮  
亦襲樊仲智氏世稱伯如荀瑩與瑤同稱智伯趙氏世稱  
孟見之哀二十年傳趙孟降于喪食注趙孟襄子無恤國  
語后子謂其徒曰趙孟將死矣卽指文子皆足以見虢叔

之後封得稱叔此鐘銘是也若虢雖亡其子孫仕于王朝亦可銘功取效大林之名冀州從事郭君碑云興自于周口蕃虞郭在河魏之間遭晉荒疆乃喪厥土亦世孳孳職思其勲子孫纓布家于樂土然則此虢叔當景王後爲王朝卿士亦或然也

時人以說叔已亡不當在景王後爲大林鐘獻疑

至稱皇考威

義周禮大司徒以儀辨等鄭注故書儀或爲義肆師凡國之大事治其禮儀注故書儀爲義詩其儀一兮箋云儀義也疏儀義理通故轉儀爲義漢碑引詩蓼莪作蓼儀亦作蓼義范式碑儀問靡述儀卽義魏三體石經左傳遺字有義儀故此稱威義者義卽古文儀蓋一字足爲經文證明如此予旣訂其實仍歸此本于何氏

漢

王莽居攝壇刻字

壇字遺刻移置在今曲阜至聖廟其一文云上谷府卿

壇壇其一文云祝其卿壇壇皆居攝二年造趙德甫首著

錄跋此不知府卿祝其卿爲何官洪氏推爲卽府丞縣丞

其說見隸續

水經注載陽嘉三年碑云府卿用基冠始

予以丞卿漢人通名之

故蓋亦有自周官太宰立其兩註兩爲兩卿鄭司農云兩

爲兩丞疏以其兩卿丞副其長先鄭以後代之官況之故

云兩丞也然則丞卿品秩皆相比從古則云卿依漢制則

云丞近人爲文好用古官名稱知府曰太守知州曰刺史

亦猶是也若漢南安長王君平鄉道碑丞什邡王卿尉綿

竹楊卿此又丞與尉並得云卿矣趙氏又云古未有土木像故爲壇以祀之兩漢時皆如此案宋玉招魂所言像設居室及抱朴子云汲郡塚中書言黃帝旣仙去其臣有左徹者削木爲黃帝之像帥諸侯朝奉之故司空張茂先撰博物志亦云黃帝仙去其臣思戀罔極或刻木立像而朝之據此則像設用土木古已有是矣

孔廟置守廟百石卒史碑

八分書永興元年在曲阜

碑首行司徒臣雄司空臣戒稽首言末言臣雄臣戒愚慙誠惶誠恐頓首頓首死罪死罪臣稽首以聞此卽漢制三公奏事之式與獨斷所云奏者亦需頭其京師官但言稽首下言稽首以聞相合然誠惶誠恐頓首死罪字蔡氏畧

之不書今以碑所載可証其有遺典也

孔君墓碑

漢孔君碑殘蝕過甚僅存篆額孔君之墓下所叙宦跡有  
官椽守長史兼行相事字可識官椽上闕文當爲五字史  
晨饗孔廟後碑五官椽魯孔囑卽叙列長史李敬之下故  
此碑孔君得以五官椽守長史也又首行年乙未字趙氏  
金石錄孔君碣在孔子墓林中其額題孔君之墓文已殘  
其前云元年乙未此碑元字已沒惟年乙未尙見然則此  
碑卽孔君碣也未審何時埋置錢塘何君夢華始剔出之  
因作林外訪碑圖亦異事也

魯相史晨祠孔廟奏銘

建寧二年  
在曲阜



碑載漢郡國奏事之式其首言建寧二年三月癸卯朔七

日巳酉魯相臣長史臣謙頓首死罪上尚書洪氏隸釋云

上尚書者郡國異於朝廷不敢直達帝所因尚書以聞也

案無極山碑載太常臣耽丞敏頓首上尚書後載尚書令

忠奏雒陽是臣耽位太常亦同郡國矣漢制羣臣奏事多

詣尚書上聞亦不盡限以內外之制獨斷所謂文多用編

兩行文少以五行詣尚書通者也

熹平殘碑

碑當癸丑歲十月黃小松遣人訪碑自曲阜東關淤土中

剔出遽告阮詹事爲移文廟戟門之側石斷剝首行丁頁

時榮闈闕之中口二行成于內名立聲著當獲自天之祥

三行口年廿有七熹平二年十一月乙未進四行府君君  
國濟民以禮聞風旌善表德五行嘉珪璋其質多麗其華  
敦書業古如六行君有命必以疾辭何辜官蒼降此短七  
行惟見一哉字子繹其文蓋亦處逸守介不延其年于時  
守斯土者表于墓也曲阜在兩漢並爲魯國今碑出於此  
而文稱府君意其爲國相與韓勅修孔廟碑後云魯相河  
南京韓君又云府君諱勅字叔節無極山碑稱太常下郡  
國相南陽馮府君北海相景君銘故北海相任城景府君  
安平相孫根碑稱皇矣府君趙相雍勸闕銘稱趙國府君  
然則漢時稱國相與太守同矣顧亭林謂府君晉漢時太  
守之稱蓋未勞推于此也熹平二年十一月乙未當爲選

疾以卒之歲未審立石在是歲否也碑自昔著錄所未及訪今爲黃君出顯晦洵有數哉

潘乾碑

光和四年十月

碑首行云蓋漢三百八十有七載口口口于口口口口銘功著斯金石其誄曰溧陽長潘君諱乾字元卓陳國長平人錢少詹事案釋名誄累也累列其事而稱之也廣韻誄壘也壘述前人之功德也誄本爲哀死而作今縣民頌其長而稱誄雖亦累德之詞然失其義矣子証以周禮太祝作六詞以通上下親疏遠近六曰誄注誄謂積累生時德行以錫之命主爲其詞也疏此六詞者皆爲生人作詞無爲死者之事是誄之名施于死生而通之殆如考妣嬪可

兼生稱也論語誄曰禱爾于上下神祇孔氏注云誄禱篇  
名說文引此作禱亦云臬功德以求福從言臬省聲推之  
此碑吏民頌其生君於義固無嫌哉碑稱布政優二詩以  
布作敷說文引書敷重莫席敷亦作布儀禮聘禮管人布  
幕於寢門注今文布作敷是布敷爲古今字

張遷表頌

中平三年二月

碑載張君除穀城長蠶月之務不閉四門臘正之際休四  
歸賀兩漢金石文字記引桂未谷說僚卽祭之異文小尔  
疋蔡法也尙書禹貢二百里蔡鄭康成注蔡之言殺滅殺  
其賦春秋左氏傳周公殺管叔而蔡蔡叔注蔡放也云  
此碑蓋謂張君治穀城未滅獄訟者省刑釋囚故下文云

尚書五敎君崇其寬詩云愷悌君隆其恩是則僚之爲祭  
無可疑者余謂僚釋作蔡句內屬正無所屬矣僚指祭祀  
之祭漢正臘日有此舊典續漢書季冬之月星迴歲終陰  
陽已交勞農夫享臘以送故初學記引今本無以送故三字獨斷臘者歲  
終大祭從吏人宴飲是也後漢書虞延傳每至歲時伏臘  
輒休遣徒繫各使歸家並感其恩應期而還華陽國志王  
長文傳試守江原令縣收得盜賊長文引見誘慰時值臘  
晦皆遣歸家獄先有繫囚亦遣之此皆因臘縱囚與碑所  
稱正合癸丑二月遇桂君于歷下舉是以質君曰子言良  
是向所証誤也因附記于此

王稚子闕銘

王稚子二闕其一銘云漢故先靈侍御史河內緜令王君  
稚子闕黃小松所藏舊拓本字尙顯存惟緜字損剝趙德  
甫釋緜作縣謂後漢書循吏傳王渙字稚子嘗爲温令而  
刻石爲河內令者蓋史之誤洪氏指河內縣令者以郡爲  
尊蓋謂河內之縣令耳卽温也予以字証之温通作緜隸  
釋所存緜字卽緜字之轉今此拓本緜旣全沒蓋當宋時  
必亦有殘蝕遂致誤認爲縣案詩飲酒温克禮器温之至  
也內則柔色以温之漢書義縱傳少温藉義並與蘊藉同  
則石刻舊必作緜也稚子見古樂府亦言渙從温補洛谷  
證史爲非誤

雲漢正義温字  
引定本作緜

周公成王畫像

右畫像爲門屏居中立一人形微小署曰成王旁二人容  
過俯署其一曰周公下羣立左右者又數人不署字案禮  
記明堂位昔者周公朝諸侯于明堂之位天子負斧戣南  
鄉而立注天子周公也負之言背也斧依爲斧文屏風于  
戶牖之間周公於前立焉据是畫成王中立則記言天子  
者成王也康成氏依家語周公相成王抱之負斧戣南面  
以朝諸侯之圖解天子爲周公義過曲矣漢隸字源載成  
王周公畫像多齊魯間漢公卿墓中物近小松得之汶上  
兩程山足徵婁氏說非誣

孝堂山畫像

孝堂山在肥城有石室畫像鐫木架左右繫以繩繩各數

人攀繩引鼎鼎既離水而繫絕又鼎耳左旁鑄龍蜿蜒仰  
噬皆莫測其所謂桂君嘗俾子考之因案水經注周顯王  
四十二年九鼎淪沒泗淵秦始皇時而鼎見于斯水始皇  
自以德合三代大喜使數千人沒水求之不得所謂鼎伏  
也亦云系而行之未出龍齒齧斷其系故語曰稱樂大旱  
絕鼎係當是孟浪之傳耳然予謂漢人已見諸圖畫則其  
傳遠矣龍齧系斷而畫作噬呵之狀龍神物也以氣噴之  
系自暗絕漢人畫理之深非俗工所計也

晉

任城太守孫夫人碑

八分書

夫人濟南孫氏之中女也實曰口姬其與口口口姓口別



賜族遂以爲氏父列卿光祿大夫建德亭侯以儒雅稱世濟其休夫人少有牀質純靜不口寬仁足以容衆明敏足以辨物九歲喪母少爲父所見慈撫終喪哀毀坐不易位口有隱括傳母之訓四以加焉父時未有繼室長沙人桓伯序有寡妻伏氏魏文帝以口妻之伏氏年少有國色然非所好而顧違尊口莫之能定夫人謂父曰何不以嘗同寮辭之父意乃寤文帝詔報之曰生敬其人死辭其室追遠敬終違而得道者也父悅入謂之曰昔臧武仲先犯齊壯不令與已邑今我不犯尊而蒙優詔同歸殊塗爾其口哉伯序爲侍中父爲侍郎此爲同寮故夫人口口父爲渤海太守十餘年政化大行孤寡口口口口先意時夫人見

□□家止父令□□而謂之□父威而良雖天之道然事  
君不懟□□□□□□□□□□爲吏部尙書多□老成先帝  
舊臣舉□行□不忘君□□□舉君爲侍中夫人□□□  
過窮理盡情爲父所異皆此類也夫人在羊氏次□有□  
度承上接下衆皆悅之任城非夫人□□主夫人由此相  
帥孝□□之謙勤戰戰臨深□恐不遑是以舅姑嘉其淑  
婉姊姒宜其德音□□夫人爲婦卅餘載言無□過行無  
怨惡故也□□上感慈□□□□下惟詩人刑于之言  
瞻前□□率由弗違以御於家邦終始以孝聞□□夫人  
之□□□□□□□□二子小子女明洪哲□□□□率早  
亾子□皆仁孝振振有麟止□化□是義□□□□□□

□□□□□□八年□次庚寅□十二月甲申□嗣子□  
哀懷永終□□罔極追惟□□□□□□□□九列□  
之訓□□歎曰古者鍾鼎□□所以章君父之令德也又  
有號謚亦□□□□□□□□我先妣立□立德□之不  
朽可沒而無稱哉於是乃追而□□爲之辭曰

煥乎文母於我夫人潛神內識罔不彌綸和樂色養□□  
□□□□□□□□是勤昧□□□令問日新喪難洪  
多仍罹□□翼翼小心惟□用老□□□□□□□□  
□□□□□□□□小小遺孤辟踊靡及曰古□□□□□□  
何以告哀

右碑額題晉任城太守夫人孫氏之碑額下有孔碑凡二

一 行行三十七字字徑寸餘惜多殘剝爲據其畧書之夫  
人濟南孫氏之中女也父列卿光祿大夫建德亭侯夫人  
九歲喪母父時未有繼室長沙人桓伯序有寡妻伏氏魏  
文帝以口妻之夫人謂父何不以嘗同寮辭之按伯序桓  
階也魏志列傳桓階字伯緒長沙臨湘人碑以緒爲序尔  
疋釋詁序緒也是古字通故也階傳言劉表辟爲從事祭  
酒欲妻以妻妹蔡氏階自陳已結婚拒而不受因辭疾告  
退是當爲階元配如碑載伏氏年少似是其繼室也階身  
歿而遺事可見近杭太宗三國志補注蓋未搜及之碑言  
伯序爲侍中父爲侍郎此爲同寮按階傳魏國初建爲虎  
賁中郎將侍中而夫人之父官侍郎亦同其時其後父歷

官侍郎渤海太守吏部尙書侍中則位亦顯矣然史不爲立傳碑亦不書名按盧毓傳文帝以毓爲吏部尙書使毓自選代乃舉阮武孫邕帝於是用邕按碑言父爲吏部尙書其時正與相近疑其爲孫邕也又魏志齊王芳紀注引魏書公卿上表列名四十六人中有光祿大夫關內侯臣邕邕又見論語集解序光祿大夫關內侯臣孫邕碑所題光祿大夫者正相合建德亭侯蓋由關內侯遞封至此耳碑云夫人在羊氏按羊氏當晉時秦山南城門閤最著任城太守爲羊氏之族惜碑不見其名遂莫可稽也晉書職官志王國改太守爲內史以宗室傳証之景王陵太始三年轉封任城王之國是任城爲王國不宜稱太守蓋當云

內史而淆亂往往相易不可遽數如桓彝見武帝紀稱宣  
城內史及按桓溫傳則亦稱太守皆此類也碑年號已據  
惟第十五行有十二月甲申字逆推前文有庚寅字又上  
有八年字據是則爲太始六年歲次庚寅也但徵於六字  
殘其上爾碑以仲爲中太爲大莊爲壯趾爲止皆古通用  
字乾隆癸丑江君秬香在新泰張孫庄搜得此碑拓一紙  
屬予及門張璞斯轉致之江君篤古好奇宜其獲此以資  
清娛然尤喜與予金石爲緣自此始也

陳

攝山棲霞寺碑銘

碑前題侍中尚書令宣德將軍叅掌機事菩薩戒弟子濟

陽江總持撰陳翊前會稽王叅軍京兆口需書陳書江總  
本傳至德四年加宣惠將軍尋授尚書令後主紀亦作宣  
惠而碑作宣德總前已叅掌選事而此又叅掌機事皆史  
文所未脩菩薩戒見總自序云弱歲歸心釋教年二十餘  
入鍾山靈曜寺則法師受菩薩戒是其事也然見於石刻  
列入題銜之內亦其時風尙如是徐孝克持菩薩戒姚察  
自敘吾在梁世當時年十四就鍾山明慶寺尙禪師受菩  
薩戒史悉載錄垂示後人必有笑其愚且妄者矣翊前會  
稽王案禎明二年會稽王莊爲翊前將軍故題銜有此碑  
經唐會昌毀廢已重立而其石斷缺文字訛殘前充寺主  
僧契先自檢募財購石依本寫之予今所据蓋康定元年

賜紫沙門懷則書者也

前秦

廣武將軍碑

碑已殘剝其文字畧可屬者有云維大秦建元四年歲在

丙辰十月一日廣武將軍

缺

使持節冠軍將軍益州刺史

上黨公之元孫三代侍中

缺

卿建忠將軍撫夷護軍扶風

太守遷口匡侯之胤子諱產字君

缺

又云君秉德口玄高

韻絕流文柔武烈令問孔修又云匡毗獻主忠訓旃異宰

政欽中顯授池陽令又卽授征西大將軍左司馬後記威

臨南界與馬翊護軍荀輔參分所口刊石又云西至洛水

東齊定陽南北七百東西二百蓋頌其功烈如此然究未



得其人始末也文前題建元四年歲在丙辰晉書載記興寧三年堅又改元爲建元今以碑証之四年實爲丙辰而歷代紀元彙考乃以爲戊辰何也

鄧太尉祠碑

入分書

碑磨蝕事跡多不屬其文有馮翊護軍建威將軍奉車都尉城安縣侯字下名氏不可見又云鄭能遠字宏道聖世鎮南叅軍水衡都尉石安令治書侍御史降南軍督都水使者缺除爲護軍甘露四年十二月廿五日到官以北接元朔給兵三百又屠刀百五十人統和寧戎鄜城洛川定陽五部領屠各上郡夫施缺白羗高德西羗盧水白虜支胡粟缺吾水雜戶七千夷獯十二種後言以太尉鄧公祠

頽朽因舊修飭遂以其年左降爲尙書庫部郎至祠成之  
歲不可攷矣水經注濮陽城南有魏使持節征西將軍太  
尉方城侯鄧乂廟廟尙有乂碑秦建元十二年廣武將軍  
兗州刺史關內侯安定彭超立後秦去魏未遠人感鄧侯  
風烈爲之置祠宇如余所收甘露四年殘碑又其一也衛  
從稱屠刀百五十人亦當時遺制世蓋罕從聞焉

元魏

司馬解造彌勒像記

彌勒像記正書在龍門文云都綰關口遊激校尉司馬解  
伯達造彌勒像一軀願皇道赫寧九荒沾泯父母康延智  
登十地仕達日遷眷屬道場聲求穉和斯福必就六趣羣

生成同此願太和年造按關口卽伊關魏嘗於此設官故  
有都縮關口遊激司馬解名魏官氏志未及當以其流品  
卑故也別體字微作激書年號而不紀年亦與他記異

魯衆造像記

記正書在龍門題云護軍府吏魯衆敬爲所生父母合門  
大小造石像一區供奉從心正始四年四月魏書官氏志  
護軍第二品中其開府置吏則見於此記也

崔敬邕墓誌銘

正書熙平二年十一月

誌石近出安平縣已取置學鄉賢祠今按其文另行序世  
系在題目之前祖秀才諱殊字敬異夫人從事中郎趙國  
李休女父雙護中書侍郎冠軍將軍豫州刺史安平敬侯

夫人中書趙國李銑女此惟行狀序三代有此式今用於誌銘亦金石例所希也下入崔公誌題序云君諱敬邕博陵安平人也年廿八被旨起家召爲司徒府主簿俄而轉尙書都官郎中兼吏部郎詮太和廿二年春宣武皇帝以君爲東朝步兵景明初丁母憂服終徵君拜爲左中郎將大都督中山王長史出圍僞義陽城拔颯旋君有協規之功授龍驤將軍太府少卿臨青男永平初持節營州刺史延昌四年徵君爲征虜將軍太中大夫以熙平二年十一月廿一日卒蒙贈大將軍濟州刺史加諡曰貞敬邕魏書有傳自初歷官至卒加贈皆與誌合惟營州刺史傳作管州爲字形之訛又延昌四年徵爲征虜將軍傳作熙平二

年卒於熙平二年而傳作神龜中謚曰貞而傳作恭當依  
碑爲正臨青男傳作臨淄男未知其孰爲審也義陽城拔  
君有協規之功卽傳所謂中山王英南討事也字別體煎  
作蕪旄作旄稟作稟

姜氏造像記

正書

記石上鐫佛龕下鐫記文畧云神龜二年七月七日清信  
女膚口姜爲亡夫橫野將軍李道奇造石像一區今在洛  
陽東二十里俗名石嘴官道旁予往來搜剔土蘇囑土人  
善置之膚下缺文當是施字膚施屬襄樂郡也

陸希道墓誌銘

正書正光口  
年在孟縣

誌石蓋篆書魏故涇州刺史淮陽男陸使君墓誌之銘凡

十六字文首行題魏故使持節守諸軍事字次行鉅鹿郡  
開國公之子並可驗識後側面題前涼州刺史兼吏部郎  
中陳郡袁翻字景翔制銘十九字吾友馮魚山拓兩紙見  
遺嘗推證其事跡載於孟縣志予據其畧云魏書陸侯傳  
後附子孫諸傳稱叡長子希道字洪度克義陽以功賜爵  
淮陽男後轉平西將軍涇州刺史正光四年卒今按誌謂  
涇州刺史淮陽男者與傳正同又誌云鉅鹿郡開國公之  
子者蓋其父叡會封此爵亦見叡傳而此誌卽陸希道誌  
石也傳稱正光四年卒則此誌固正光間物矣袁翻傳由  
著作佐郎歷官至涼州刺史還拜吏部郎中亦與此題合

樊道德造像記

記正書在龍門文云永熙二年七月十日清信士佛弟子揚烈將軍羽林監大官承樊道德爲忘妻張造釋迦像一區友願忘者神生靜社值遇諸佛現在眷屬口掌與善口口口魏書官氏志有揚烈將軍而羽林監大官承闕於紀錄當依此記補之

張法舜造像記

正書天平二年四月在登封少林寺

記爲比丘洪寶所製驗其文云務聖寺檀主張法舜於熙平二年捨宅爲寺宿願鑿像未獲畢志其息榮遷亦願刻石建像釋迦文佛觀音文殊仰述亡考舊願者予畧著其始末以爲嵩陽石刻補遺

中岳嵩陽寺碑

八分書天平二年四月在登封

碑在會善寺廢戒壇字多漫蝕予今收得舊本復次其文云大德沙門生禪師隱顯無方沉浮崧嶺此山先來未有塔廟禪師卜茲福地創立神場當中岳之要害對衆術之樞牙司空公裴衍昔在齊都欽承師德願歸中國爲寺檀主本願旣從雲歸表節魏書列傳衍字文舒仕蕭寶卷至陰平太守景明二年始得歸國授通直郎衍欲辭朝命請隱嵩高碑所謂雲歸表節實與傳命也衍後歷顯仕北討葛榮軍敗見害貽使持節車騎大將軍司空相州刺史今碑稱司空公者舉其贈官也後稱禪師大弟子沙門統倫豔二法師各窺兩塔仰副師願沙門統者魏制館轄僧衆之名釋老志沙門統惠深上言是其証也



授堂金石文字續跋卷一終

受業魯山李洲校

授堂金石文字續跋卷二

偃師武億虛谷著

男穆淳編

孫未重校刊

東魏敬使君碑

正書典和二  
年在長葛縣

碑題禪靜寺刹前銘敬使君之碑文云公名空一字顯儻

蓋因寺爲潁川太守梁洪雅所建而顯儻復事修置時人  
頌之如此其稱史君者顯儻爲潁州刺史也禮雜記客使  
自下注使或爲史漢書霍光傳使樂成小家子師古曰使  
者其姓也字或作史因知史與使二字古可通用也顯儻  
歷官北史本傳稱從神武信都義舉歷位度支尙書以功  
封永安縣侯河清中卒於兗州刺史齊書本傳爲羽林監  
高祖啓爲別駕行臺倉部郎中轉都官尙書二書所載畧

異然以碑証之蓋於孝莊初封泰平縣開國子及拜車騎將軍孝靜初爲汾州刺史轉晉州刺史拜儀同三司驃騎大將軍潁州刺史大都督潁州諸軍事皆未及也

張府君殘碑

碑滅沒所餘文字已不能屬次惟題大魏故勃海太守張府君字存後題興和三年三月前人未著錄陸稼書先生載入靈壽縣志今在城中古寺內辛亥夏四月余假自黃小松拓本爲著其目如是

李仲璇修孔子廟碑

正書興和三年十二月在曲阜

碑爲府州佐及令士民樹於廟廷蓋記李仲璇修廟設像容其云仲璇自隸兗部嘗未涉旬言觀孔廟遂有斯役魏

書本傳出除車騎大將軍兗州刺史仲璇以孔子廟

堵頗

有頽毀遂改修焉是其事也碑稱乃命工人修建容像孔

子曰從我於陳蔡者皆不得及門也因歷叙其才以爲四

科之目生旣見從歎□□侍雕素十子□□其側今於□

□□□奉進儒冠於諸徒亦青衿青領按水經注魏黃初

元年文帝令郡國修起孔子舊廟廟有夫子像列二弟子

執卷侍立是廟制久以弟子配矣然十哲之侍後世蓋沿

於此乎故爲著其自也聖容及列侍諸賢並從儒服制猶

近古其後但以袞冕炫飾非崇素之意矣

小松云碑側有一行知是王長儒書

楊顯叔造像記

正書在神通寺

記云武定二□□月乙卯朔十四日戊辰冠軍將軍司空

府前西閣祭酒齊州驛大府長流叅軍楊顯叔仰爲亡考  
忌十四日敬造石像四區願令亡者生常值佛魏書地形  
志齊州治歷城此記今在神通寺正歷城界也官氏志司  
空皇子之開府祭酒記稱司空府前西閣祭酒蓋與志合  
而驛大府長流叅軍名號志所未備也此記由陸古漁覓  
得予最先覩爲跋之如是

王雙虎造像記

正書

記爲黃小松拓寄前者錄者未目及之今按其文云大魏  
武定二年歲次甲子十二月辛亥朔四日甲寅東阿縣王  
雙虎法義五十九人等敬造觀世音石像一軀云  
云按魏  
石刻多稱清信士邑中正諸名謂此又稱法義亦希覩也

別體字竭作竭切作功陞作陞溜作溜甄作甄遵作遵儀  
作儀靈作靈勅作勅名內有高醜棋王桃捧劉黑驢王醜  
皆俚俗可笑然由其時習若此竟不可易也

僧惠造像記

正書武定三年七月在河內縣唐村

記稱魏大法師故沙門都法恩願雕真容未終勝因奄從  
物化弟子法度欲建嵩塔亦爲暴疾所鍾潛魄深夜後有  
上座僧惠寺主王法合邑主朱永隆唐豐七十人等共造  
天宮一堰其畧如此字多別體以轍爲澈焚爲熿變爲麥  
因爲因苑爲苑號爲嚙告爲吉龕爲堪碍爲尋棘爲棘垣  
爲桓同爲因永爲融其與古合者如豪從豕惑不加心門  
從兩所表作表崇作嵩之類悉有依據不墮當時之習碑

鑿龕爲像傍刻菩薩主安東將軍程鐘葵維摩主冠軍將

軍安西府長史

名

拔授洛陽令後口武得太守程曰龍彌

勒主前督府長史趙珍彌勒主懷州祭酒李思安文殊主

前後二代縣主簿郭榮顯拔授即拔授與魏修太公廟碑

陰同魏書官氏志有司州主簿司州祭酒從事据碑則縣

亦有主簿而懷州更置祭酒皆史所未錄石爲康少山訪

得癸丑夏五月余過少山遂命僕榻出之以資予續跋所

未及

太公廟碑陰

正書武定八年

碑陰文多殘損凡作四層題名皆尙氏碑陽稱尙氏之興

源出姜氏此固太公之裔附於此也第一層名位可紀

者尙其明尙長興尙令都尙來歡尙嗣業尙顯承長興太  
守口陽子尙欽故拔授鉅鎡太守尙遠第二層故拔授頓  
邱太守尙馮虎故拔授長口太守尙珠故口口郡功曹尙  
次平故口尙次信拔授口陽太守尙及口拔授頓邱太守  
尙口流拔授口平縣令尙及龍尙金龍拔授恒農太守尙  
龍口拔授口郡太守尙陽生拔授潁川太守尙自真拔授  
武德太守尙口口第三層拔授口口口汲郡太守尙文秀  
故拔授武德汲郡太守尙靜先故拔授汲郡太守尙神龜  
故拔授城高太守尙道故拔授蔡陽太守尙蘭椿拔授河  
澗太守尙口前除口口太守拔授口縣令尙寶洪補郡功  
曹尙恒拔授武德河內郡太守尙夏成拔授汲縣令尙海



珍板授武德太守尙昭興尙定成尙嵩岳寧朔將軍員外  
奉車都尉尙顯文襄武將軍口陽郡王尙口成第四層板  
授汲縣令尙充尙定業尙祖延尙顯貴尙平歡尙安似尙  
靜滿尙文僖此下又列數人字微小稱討口將軍奉朝請  
尙始尙士讓尙邦寧尙伯保名按諸尙列郡守縣令而題  
曰板授蓋由推恩加以虛號所謂賜百年以上假郡守假  
縣令也魏書肅宗紀熙平二年四月丁酉詔京尹所統百  
年以上賜大郡板九十以上賜小郡板神龜元年春正月  
壬申詔京畿百年以上給大郡板九十以上給小郡板八  
十以上給大縣板七十以上給小縣  
板諸州百姓百歲以上給小郡板九十以上給  
上縣板八十以上給中縣板孝莊紀建義二年五月詔上

黨百年以下九十以上板三品郡八十以上四品郡七十以上五品郡孝靜紀天平三年十有二月辛未遣使者板假老人官百歲以下各有差崔孝芬傳司徒彭城王勰板爲行參軍吳悉達傳刺史以悉達兄弟行著鄉閭板贈悉達父渤海太守此碑稱板授卽紀傳所言賜板給板板假板贈之謂而碑以板爲板蓋當時別體如是其城高蔡陽二郡名不載地形志疑城高爲成皋而蔡陽或淪陷於異地志故無文也員外奉車都尉案官氏志有奉車都尉而無員外正始四年九月詔奉車都尉禁侍美官顯加通貴世移時變遂爲冗職旣典名猶昔宜有定員是自正始前奉車都尉添置猥濫蓋有員外矣當時詔文雖定爲二十

人及武定之季漸益增設故見於是碑者復有此名是亦志所未推稽也

法師惠猛墓誌銘

誌銘裝潢本失其年月字體瘦約易漸磨蝕後半已難辨約其文云法師緣姓陰氏燉煌人高祖孝文皇帝重其風流禮容至厚委以元綱仗之口務神鑒一踐玉石自分惠識再臨蘭艾斯辨昇帝床入紫幕言微而孤上理絕而音口然則惠猛遭遇之盛亦其有所以護持教法足移世聽者與魏書釋老志世宗以來至武定末沙門知名者有惠猛惠辨惠深僧暹道欽僧獻道暄僧深惠光惠顯法營道長並見重於當世今此誌惠猛卽當時名僧之一而史言

其知名自世宗以來亦未審其於高祖已崇重若是矣前  
題故照立沙門都維那按志稱先立監福曹又改爲昭立  
備有官屬以斷僧務照立即昭立誌所云委以元綱仗之  
口務是惠猛又嘗總僧務也書僧云緣姓不作俗姓亦爲  
誌釋氏者又舉一例

白駒谷題名

正書在益都城  
西南北峯山

右題名字徑尺餘文云此白駒谷中岳先生焚陽鄭道昭  
遊盤之山谷也凡十九字魏書北史道昭俱有傳稱其歷  
光青二州刺史今此題無年月按道昭以魏永平中爲光  
州刺史及轉爲青州則又後於永平矣是其題名當在此  
時也北史道昭子述祖傳云父爲兗州於鄭城南小山起

齊亭刻石爲記述祖時年九歲及爲刺史往尋舊迹得一  
破石有銘云中岳先生鄭道昭之白雲堂蓋道昭所在題  
記皆自署號如此然白雲堂刻字當齊天保中已殘毀而  
此獨巋然存焉豈有神物相之耶兗州卽光州之訛

### 大覺寺碑

碑久佚已載府志爲不可尋覓庚戌歲予遊洛城在今東  
南隅俗名四眼井覩巨碑矗立兩側面俱鏤花枝繚結碑  
陽刻前明人修儒學記其陰平漫惟大覺寺碑四篆字陰  
文凸起乃知此碑遭妄人所磨爲歎息者久之卽藍記載  
碑永熙中溫子昇爲文而金石錄又載東魏大覺寺碑陰  
題韓毅書今碑質雖存實無文字可驗未知其審矣

趙振造像記

記正書無年月在洛陽龍門題云強弩將軍掖庭令趙振  
仰爲七世父母正持敬造彌勒像一塔凡作五行審其文  
字似屬魏刻也魏書官氏志載強弩將軍從第四品下又  
載掖庭監從第五品上而此稱掖庭令疑令卽監之異文  
官名改易志未脩耳

石佛背殘字

正書無  
年月

佛背字在清化興教寺後殿予移出撫其背蓋用界畫區  
分作數層繡像旁列佛弟子諸名朱洪貴朱曰修李桃口  
郎輔伯朱譽李萬安朱道貴朱合口朱宅宅口張萬安清  
信士女馮口兩側面亦列清信女朱伯陵朱貴陵佛弟子

那達摩吳思口清信女朱口醜朱阿曾朱伯口又有張延  
齊侍四字玩其命名當爲魏刻達摩主法少林於時稱曲  
之東亦竊其名魏他碑刻亦未見

北齊

趙郡王高歡碑

正書天保八年  
在靈壽縣那林院

碑在那林院地僻多虎暴拓者絕少王子夏假黃小松藏  
本闕數日因著其畧云定州定國寺禪師僧樹施淨財爲  
禪室於二十餘年數復興斯寺廣布福田以爲祝頌文瞻  
麗成體書數歷官使持節都督定幽安平東燕滄瀛諸軍  
事撫軍將軍儀同三司定州刺史六州大都督趙郡王齊  
書獻本傳顯祖受禪二年出爲定州刺史加撫軍將軍六

州大都督三年加儀同三司七年詔以本官都督滄瀛幽  
安平東燕六州諸軍事滄州刺史据此碑散於時仍爲定  
州刺史如傳言刺滄州則詔以本官都督六州諸軍事處  
有違也文內稱先公佐世嘗歷斯蕃歿父琛永熙二年除  
使持節都督定州刺史六州大都督也

鄉老舉孝義傳敬碑

正書皇建元年十二月

碑載傳敬字修羅鑽土葺安食菜勃海前漢帝臣傳不疑  
公之遺孫九世祖朗遷官于魯遂住洙源幼傾乾蔭惟母  
編居易色承顏董生未必過其行守信志忠投杼豈能  
着其志又云余等鄉老一百餘人目睹其事寧容嘿焉口  
刊石立樓以彰孝義蓋其時民知興行敦尙義舉爲可風



也曲阜顏運生得自泗水卞橋遂從京邸封寄君爲魯故  
一書此碑之顯當益富有矣

臨淮王像碑

八分書

臨淮王像碑在青州府城東北文昌閣臥置地中已斷  
裂予與楊書巖段赤亭方議募金重爲立石之舉會予罷  
官以去事不果矣碑首行題大齊武平四年歲次癸巳二  
月乙未朔二十七日辛酉建與他碑書年月在後者異文  
內稱使持節都督青州諸軍事驃騎大將軍青州刺史司  
空公寧都縣開國公高城縣開國公昌國侯臨淮王者婁  
昭次子定遠也北齊書北史並有傳惟載別封臨淮郡王  
位司空尋除瀋州刺史失錄爲青州又列爵公侯史亦畧

之定遠力營佛事而反貪賂以成趙郡之禍無怪其禍亦旋至也佛不庇姦頑如是奈何人弗省哉

曾善寺造像記

正書武平七年十一月今在登封

誌石多漫滅第一層載造像之人比丘僧智滿邑主宋始興合邑一百人等

云

二層皆諸比丘名三層列邑人名

內有稱李娥容張女子張四孃姚元妃王阿妃當以男子而冒女婦之號如馮婦徐夫人之屬蓋其詭說不經如此

佛座石文

正書

石文磨泐凡六字其云大齊承光元年歲次丁酉正月乙亥朔十五日乙丑佛弟子張思文敬造無量壽佛一軀並觀音大勢至願師僧父母口口眷屬口口稱心常口諸佛

國祚永隆民寧道業一切會靈咸口斯慶承光濟初主年  
號正月乙亥朔初主卽於是日卽位又乙亥而禪位大丞  
相任城王楷矣此石拓本蓋由諸城李孝廉山甫家得之  
高密任君青田寄予今爲吳南鄉取去

後周

豆盧恩碑

八分書

碑自顧亭林收錄已云後半漫滅不可讀今并漫滅者爲  
妄人毀治吾友陸直之覓得一本予節次其文云君諱恩  
字永恩昌黎徒何人本姓慕容燕文明皇帝號之後自天  
市星妖連津兵覆尙書府君改姓豆盧筮仕於魏祖什伐  
左將軍魏文成皇帝直寢父莫保定二年有詔贈柱國大

將軍涪陵郡公下言恩普太二年關西建義授殄寇將軍  
奉迎大駕賜封新興縣伯邑五百戶大統三年有沙苑之  
戰四年有河橋之役授龍襄將軍中散大夫八年授直寢  
右親信都督尋轉大都督加通直常侍十六年使持節車  
騎大將軍儀同三司魏前元年授驃騎大將軍開府儀同  
三司後歷官有都督成州諸軍事成州刺史尋加侍中又  
有大將軍安政公周元年授都督鄯州刺史及利州刺史  
字案恩附北史豆盧寧傳惟書弟永恩則但著其字而歷  
官亦不如碑之詳也又傳稱恩之先賜姓或云北人謂歸  
義爲豆盧因氏焉宰相世系表同又云避難改焉未知孰是據碑  
稱天市星妖連津兵覆尙書府君改姓豆盧是宜以避難

爲得其實交葛傳言魏柔元鎮將碑不書其官傳言武成  
中以寧勳追贈柱國大將軍少保涪郡公碑載追贈在保  
定二年又於涪郡作涪陵皆史文誤也又沙苑河橋案周  
太祖本紀大統三年十月壬辰至沙苑距齊軍六十餘里  
神武引軍來會云四年七月帝率輕騎追至河上景等北  
據河橋南屬芒山卽其事是也至稱魏前元年者廢帝於  
時行周禮廢年號故也唐書宰相世系表北地愍王精二  
子醜勝醜下空一格下書葛下承恩以碑證之醜下空  
格是爲什伐左將軍魏文成皇帝直寢表失紀其名與官  
闕踈脫甚矣

隋

仲恩那造橋碑

正書開皇六年二月

碑題兗州高平縣石裏村仲恩那卅人造橋之碑餘文皆完好在鄒縣西南五十里顏運生訪得之陰有上元二年趙子路等題名案隨書地里志高平屬下邳郡下邳周改爲泗州則高平宜爲泗州之屬矣開皇間宋文彪造橋碑有泗州高平縣魏君還名是可例証也然此題稱兗州高平縣充卽兗字之訛是高平又屬兗州矣縣殆由高平割并四封已包入鄒縣之境故鄒旣隸兗則高平亦可稱屬兗州與

東阿王廟碑

開皇十年

碑前序子建爵封類三徙都蓋依魏志爲文後又稱十一

世孫曹永洛等齊朝皇建二年蒙口尊孝昭皇帝恢宏古  
典敬立二王崇奉三恪永洛等於時磨符表貢面奉昭皇  
親承聖詔蒙勅報允興復靈廟雕鏤真容其記子建廟祀  
所起如此北齊書孝昭紀皇建元年詔昔武王克殷先封  
兩代漢魏二晉不廢茲典及元氏統歷不率舊章朕纂奉  
大業思宏古典但二王三恪舊說不同可議定是非列名  
條奏其禮儀體式亦仰議之今碑所稱卽指其事但以爲  
皇建二年者下詔在元年八月議定施行當爲二年各從  
其實書之也曹魏系出自虞故以曹氏脩三恪之一當時  
光復古制史文不悉載賴此以知其槩古刻流傳何可沒  
哉碑云黃內通理及懷正信如見疑皆避中字如見疑者

如與而通也

澧水石橋纍文碑

八分書

碑殘蝕文字已不可屬句予今據其畧蓋宋文彪等造橋所記其紀年僅有開皇字歲次鴉三字而額稱隋邢州南和縣澧水石橋纍文碑字獨完好元和郡縣志南和隋開皇十六年改屬邢州是此碑之立在十六年後矣明嘉靖間南和尹易宗周爲詩題諸碑陰其子圖又附識於此謂碑雖云邢州而猶稱大隋疑其當時改郡未久明人淺率不知推稽類如是也纍文者卽說文譌字釋名所云累列其事而稱之今碑末四字韻句述造橋之美是其義矣

宋文彪造澧水石橋碑

八分書  
開皇



碑首題洛州南和縣後言敬造石橋以濟行者以開皇十一年龍集于淵獻月纏于降婁爰共經始數年乃就是橋之成又在十一年後矣元和郡縣志南和隋開皇三年屬洛州十六年改屬邢州此碑題洛州南和于時未改屬也造橋者縣老人宋文彪等附列者使持節儀同三司辛公名慤字士信隴西狄道人翊軍將軍司馬田威馮翊廣陽人宣威將軍縣令馬君名煜字士暉扶風始平人縣尉兗州鄒縣孔經泗州高平縣魏君遐按隋書地理志馮翊不載廣陽今碑稱馮翊廣陽疑後避煬帝諱併改

如通典廣平縣隋以

煬帝諱改

承年是也克兆郡始平故置扶風郡開皇三年郡廢以此

碑案之當時必以廢郡置始平縣其地舊爲扶風郡故仍

稱爲扶風始平人也徐城梁置高平郡東魏又併梁東平陽平清河歸義四郡爲高平縣開皇初郡廢十八年更名徐城然則造橋時自宜稱高平也儀同三司尊之曰公令尉次之曰君必也正名此爲不苟矣

失名造像記

記正書今在魯山縣南關觀音堂石邊歲無年代可稽李于所拓一本見贈按其名題有都邑平正邑平正者凡數見平正卽中正當是隋刻諱中爲平故耳魯山舊碑罕有收者予故著之

授堂金石文字續跋卷二終

受業夏邑張曰珩校